

T29

*Thyestes* 885-1112  
Il trionfo di Atreo

Personaggi in scena

ATREVS

THYESTES

- 885 ATREVS Aequalis astris gradior et cunctos super  
altum superbo vertice attingens polum.  
Nunc decora regni teneo, nunc solium patris.  
Dimitto superos: summa votorum attigi.  
Bene est, abunde est, iam sat est etiam mihi.
- 890 Sed cur satis sit? Pergam et implebo patrem  
funere suorum. Ne quid obstaret pudor,  
dies recessit: perge dum caelum vacat.  
Utinam quidem tenere fugientes deos  
possem, et coactos trahere, ut ultricem dapem
- 895 omnes viderent – quod sat est, videat pater.  
Etiam die nolente discutiam tibi  
tenebras, miseriae sub quibus latitant tuae.  
Nimis diu conviva securo iaces  
hilarique vultu; iam satis mensis datum est
- 900 satisque Baccho: sobrio tanta ad mala  
opus est Thyeste. – Turba famularis, fores  
templi relaxa, festa patefiat domus.  
Libet videre, capita natorum intuens,  
quos det colores, verba quae primus dolor
- 905 effundat aut ut spiritu expulso stupens  
corpus rigescat. Fructus hic operis mei est.  
Miserum videre nolo, sed dum fit miser.  
Aperta multa tecta conludent face.  
Resupinus ipse purpurae atque auro incubat,
- 910 vino gravatum fulciens laeva caput.  
Eructat. O me caelitum excelsissimum,  
regumque regem! Vota transcendit mea.  
Satur est; capaci dicit argento merum –  
ne parce potu: restat etiamnunc crux
- 915 tot hostiarum; veteris hunc Bacchi color  
abscondet – hoc, hoc mensa cludatur scypho.  
Mixtum suorum sanguinem genitor bibat:  
meum bibisset. Ecce, iam cantus ciet  
festasque voces, nec satis menti imperat.
- 920 THYESTES Pectora longis hebetata malis,  
iam sollicitas ponite curas.  
Fugiat maeror fugiatque pavor,  
fugiat trepidi comes exilii  
tristis egestas
- 925 rebusque gravis pudor afflictis:  
magis unde cadas quam quo refert.

- Magnum, ex alto culmine lapsum  
stabilem in plano figere gressum;  
magnum, ingenti strage malorum  
**930** pressum fracti pondera regni  
non inflexa cervice pati,  
nec degenerem victumque malis  
rectum impositas ferre ruinas.  
Sed iam saevi nubila fati  
**935** pelle ac miseri temporis omnes  
dimitte notas;  
redeant vultus ad laeta boni,  
veterem ex animo mitte Thyesten.  
Proprium hoc miseros sequitur vitium,  
numquam rebus credere laetis:  
**940** redeat felix fortuna licet,  
tamen afflictos gaudere piget.  
Quid me revocas festumque vetas  
celebrare diem, quid flere iubes,  
nulla surgens dolor ex causa?  
**945** Quis me prohibet flore decenti  
vincire comam, prohibet, prohibet?  
Vernae capiti fluxere rosae,  
pingui madidus crinis amomo  
inter subitos stetit horrores,  
**950** imber vultu nolente cadit,  
venit in medias voces gemitus.  
Maeror lacrimas amat assuetas,  
flendi miseris dira cupido est.  
Libet infaustos mittere questus,  
**955** libet et Tyrio saturas ostro  
rumpere vestes, ululare libet.  
Mittit luctus signa futuri  
mens ante sui praesaga mali:  
instat nautis fera tempestas,  
**960** cum sine vento tranquilla tument.  
Quos tibi luctus quosue tumultus  
fingis, demens?  
Credula praesta pectora fratri:  
iam, quidquid id est, vel sine causa  
vel sero times.  
**965** Nolo infelix, sed vagus intra  
terror oberrat, subitos fundunt  
oculi fletus, nec causa subest.  
Dolor an metus est? An habet lacrimas  
magna voluptas?  
**970** At. Festum diem, germane, consensu pari  
celebremus: hic est, sceptrum qui firmet mea

- solidamque pacis alliget certae fidem.
- TH.** Satias dapis me nec minus Bacchi tenet.  
Augere cumulus hic voluptatem potest,  
**975** si cum meis gaudere felici datur.
- AT.** Hic esse natos crede in amplexu patris.  
Hic sunt eruntque; nulla pars prolis tuae  
tibi subtrahetur. Ora quae exoptas dabo  
totumque turba iam sua implebo patrem.
- 980** **S**atiaberis, ne metue. Nunc mixti meis  
iucunda mensae sacra iuvenilis colunt;  
sed accentur. Poculum infuso cape  
gentile Baccho. **TH.** Capio fraternalae dapis  
donum. Paternis vina libentur deis,
- 985** tunc hauriantur – sed quid hoc? Nolunt manus  
parere, crescit pondus et dextram gravat;  
admotus ipsis Bacchus a labris fugit  
cirque rictus ore decepto fluit,  
et ipsa trepidi mensa subsiluit solo.
- 990** **V**ix lucet ignis; ipse quin aether gravis  
inter diem noctemque desertus stupet.  
Quid hoc? Magis magisque concussi labant  
convexa caeli; spissior densis coit  
caligo tenebris noxque se in noctem abdidit:
- 995** fugit omne sidus. Quidquid est, fratri precor  
natisque parcat, omnis in vile hoc caput  
abeat procella. Redde iam gnatos mihi!  
**AT.** Reddam, et tibi illos nullus eripiet dies.  
**TH.** Quis hic tumultus viscera exagitat mea?
- 1000** **Q**uid tremuit intus? Sentio impatiens onus  
meumque gemitu non meo pectus gemit.  
Adeste, nati, genitor infelix vocat,  
adeste. Visis fugiet hic vobis dolor. –  
Unde obloquuntur? **AT.** Expedi amplexus, pater;
- 1005** **v**enere. Natos ecquid agnoscis tuos?  
**TH.** Agnosco fratrem. Sustines tantum nefas  
gestare, Tellus? Non ad infernam Styga  
te nosque mergis rupta et ingenti via  
ad chaos inane regna cum rege abripis?
- 1010** **N**on tota ab imo tecta convellens solo  
vertis Mycenas? Stare circa Tantulum  
uterque iam debuimus: hinc compagibus  
et hinc revulsis, si quid infra Tartara est  
avosque nostros, hoc tuam immani sinu
- 1015** demitte vallem, nosque defossos tege  
Acheronte toto. Noxiae supra caput  
animaе vagentur nostrum et ardenti freto  
Phlegethon harenas igneus totas agens

exilia supra nostra violentus fluat –  
**1020** immota tellus, pondus ignavum iaces?  
 Fugere superi. **AT.** Iam accipe hos potius libens  
 diu expetitos: nulla per fratrem est mora;  
 fruere, osculare, divide amplexus tribus.  
**TH.** Hoc foedus? Haec est gratia, haec fratris fides?  
**1025** Sic odia ponis? Non peto, incolmis pater  
 natos ut habeam; scelere quod salvo dari  
 odioque possit, frater hoc fratrem rogo:  
 sepelire liceat. Redde quod cernas statim  
 uri; nihil te genitor habiturus rogo,  
**1030** sed perditurus. **AT.** Quidquid e natis tuis  
 superest habes, quodcumque non superest habes.  
**TH.** Utrumne saevis pabulum alitibus iacent,  
 an belvis vorantur, an pascunt feras?  
**AT.** Epulatus ipse es impia natos dape.  
**1035** **TH.** Hoc est deos quod puduit, hoc egit diem  
 aversum in ortus. Quas miser voces dabo  
 questusque quos? Quae verba sufficient mihi?  
 Abscisa cerno capita et avulsas manus  
 et rupta fractis cruribus vestigia –  
**1040** hoc est quod avidus capere non potuit pater.  
 Volvuntur intus viscera et clusum nefas  
 sine exitu luctatur et quaerit fugam:  
 da, frater, ensem (sanguinis multum mei  
 habet ille): ferro liberis detur via.  
**1045** Negatur ensis? Pectora inliso sonent  
 contusa planctu – sustine, infelix, manum,  
 parcamus umbris. Tale quis vedit nefas?  
 Quis inhospitalis Caucasi rupem asperam  
 Heniochus habitans quisve Cecropiis metus  
**1050** terris Procrustes? Genitor en natos premo  
 premorque natis – sceleris est aliquis modus.  
**AT.** Sceleri modus debetur ubi facias scelus,  
 non ubi reponas. Hoc quoque exiguum est mihi:  
 ex vulnere ipso sanguinem calidum in tua  
**1055** defundere ora debui, ut viventium  
 biberes cruorem – verba sunt irae data  
 dum propero. Ferro vulnera impresso dedi,  
 cecidi ad aras, caede votiva focos  
 placavi, et artus, corpora ex anima amputans,  
**1060** in parva carpsi frusta et haec ferventibus  
 demersi aenis; illa lentis ignibus  
 stillare iussi; membra nervosque abscidi  
 viventibus, gracilique traiectas veru  
 mugire fibras vidi et aggesi manu  
**1065** mea ipse flamas – omnia haec melius pater

fecisse potuit, cecidit in cassum dolor:  
 scidit ore natos impio, sed nesciens,  
 sed nescientes. **TH.** Clausa litoribus vagis  
 audite maria, vos quoque audite hoc scelus,  
**1070** quocumque, di, fugistis. Audite inferi,  
 audite terrae, Noxque Tartarea gravis  
 et atra nube, vocibus nostris vaca  
 (tibi sum relictus, sola tu miserum vides,  
 tu quoque sine astris), vota non faciam improba.  
**1075** Pro me nihil precabor – et quid iam potest  
 pro me esse? Vobis vota prospicient mea.  
 Tu, summe caeli rector, aetheriae potens  
 dominator aulae, nubibus totum horridis  
 convolve mundum, bella ventorum undique  
**1080** committe et omni parte violentum intona,  
 manuque non qua tecta et immeritas domos  
 telo petis minore, sed qua montium  
 tergemina moles cecidit et qui montibus  
 stabant pares Gigantes, hac arma expedi  
**1085** ignesque torque. Vindica amissum diem,  
 iaculare flamas, lumen erectum polo  
 fulminibus exple. Causa, ne dubites diu,  
 utriusque mala sit; si minus, mala sit mea:  
 me pete, trisulco flammeam telo facem  
**1090** per pectus hoc transmitte – si gnatos pater  
 humare et igni tradere extremo volo,  
 ego sum cremandus. Si nihil superos movet  
 nullumque telis impios numen petit,  
 aeterna nox permaneat et tenebris tegat  
**1095** immensa longis sclera. Nil, Titan, queror,  
 si perseveras. **AT.** Nunc meas laudo manus,  
 nunc parta vera est palma. Perdideram scelus,  
 nisi sic doleres. Liberos nasci mihi  
 nunc credo, castis nunc fidem reddi toris.  
**1100** **TH.** Quid liberi meruere? **AT.** Quod fuerant tui.  
**TH.** Natos parenti – **AT.** Fateor, et, quod me iuvat,  
 certos. **TH.** Piorum praesides testor deos.  
**AT.** Quid? Coniugales? **TH.** Scelere quis pensat scelus?  
**AT.** Scio quid queraris: scelere praerepto doles;  
**1105** nec quod nefandas hauseris angit dapes:  
 quod non pararis! Fuerat hic animus tibi  
 instruere similes inscio fratri cibos  
 et adiuvante liberos matre aggredi  
 similique leto sternere – hoc unum obstitit:  
**1110** tuos putasti. **TH.** Vindices aderunt dei;  
 his puniendum vota te tradunt mea.  
**AT.** Te puniendum liberis trado tuis.